

四庫全書

集部

欽定四庫全書

集部

粵西叢載卷二十四

五

詳校官庶吉士_臣瑚圖禮

主事銜_臣徐以坤覆勘

總校官庶吉士_臣朱銓

校對官學正_臣常循

謄錄監生_臣潘河

欽定四庫全書

粵西叢載卷二十四

桂林府通判汪森編

里

蠻種名色已詳文載
中此復稍補其闕畧

建武十二年九真徼外蠻里張

里蠻之別號今
別呼為里人

率種人

慕化內屬封為歸漢里君

後漢書

廣州南有俚賊在蒼梧鬱林合浦寧浦高涼五郡中央
地方類千里往往別村各有常帥無君主恃在山險自

古及今彌歷年紀民俗蠢愚惟知貪利無有仁義道理
土俗不愛骨肉而貪寶貨及牛犢若見有假人財物水
牛者便以其子易之夫或鬻婦兄亦賣弟若鄰里有負
其家債不時還者其子弟中愚者謂其父兄曰我為汝
取錢汝但當善殯葬我耳其處多野葛為鈎挽數寸徑
到債家門下謂曰汝負我錢不肯還我今當自殺因食
野葛死於債家門下其家便稱怨宗族人衆往債家汝
不還我錢而殺我子弟今當擊汝債家懼因以牛犢財

物謝之數十倍死家乃自收死者罷去不以為恨

南州異物

志

蠻

廣西控扼夷蠻曰邕曰宜邕屯全將宜屯半將皇祐間分宜州為一路帥所統多夷州後罷為郡今守臣猶兼廣西都監為慶遠節度宜之西境有南丹州安化州三州一鎮又有撫水五洞龍河茅灘荔波等蠻及陸家砦其外有龍羅方石張五姓謂之淺蠻又有西南韋番及

蕪綺羅坐夜回計利流求謂之生蠻又其外則有羅殿

毗那大蠻皆徑路直抵宜城之境上

嶺外代答

徽宗大觀二年有融州屬蠻大丘洞首領楊光朝請內
附又有楊克端等百三人來歸皆納之諸蠻族類不一
大抵依阻山谷並林木為居椎髻跣足走險如履平地
言語侏離衣服褊爛畏鬼神喜淫祀刻木為契不能相
君長以財力雄彊每忿怒則推刃同氣加兵父子間復
讎怨不顧死出入腰弓矢匿草中射人得牛酒則釋然

矣親戚比鄰指授相賣父子別業父貧則質身於子去

禽獸無幾

宋史

甲尚蠻役屬交趾宋景祐嘉祐間出寇邕州

學海

古稱天竺咳首焦僂跂踵穿胸僂耳狗軛旁脊謂之八

蠻其文面尤異者則有飛頭鑿齒鼻飲花面白衫赤視

之屬嶺表左右及海外諸國在在有之而僂耳交趾遂

以名郡

炎徼紀聞

徭

徭人古八蠻之種也五溪以南窮極嶺海迤邐巴蜀皆有之椎髻斑衣婦人黥面為花卉蜻蛉蝴蝶之狀山田瘠墾十歲五饑急則隳突漢界持短槍控大弩毒矢攻剽墟落踉蹌篁薄中飄忽往來不可蹤跡山中多杉板藥物四方亡命若避徭賦者此焉逋藪洧雜夷中為之嚮導分受擄獲結黨既多則公隳城堡劫官寺故廣之東西歲苦兵事諺云比年小征三年大征然亦僅矣史氏槃瓠之說雖恍惚難稽然徭人多槃姓者或訛而為

盤云猺獠雖異族而信鬼畏誓大略相同在唐虞謂之
要服蓋以信義要質而已

炎徵紀聞

平地猺居食嫁娶悉與民同男人髣髴髮止於四旁婦人
衣斑斕衣刺繡亦古雅耕田納賦惟不任差遣間亦有
讀書應考者性最淳朴畏見官吏常為胥皂所魚肉不

能自直

臨桂縣志下同

高山猺架竹木為屋覆以青茅種禾黍山芋豆薯為糧
有蜂蜜黃蠟香草香蓴木耳乾笋茶葉等物每無定居

數年此山數年又別嶺亦有以剗瓢為業者嶺磴險阨
負載者悉著於背繩繫於臂僂而趨上下甚捷善用弩
名偏架弩弩牀以紮榆為之其箭甚毒中人輒死但性
最謹厚世亂人多携家往就之皆樂為効力雖託之細
軟亦不致有失也此惟東鄉徭則然

永福白徭散居毛崗里之大波塘并理定里地方深居
山谷不與他徭撞往來老死不入城市以木皮覆屋編
桑著為衣被夜寒則家人婦子圍爐一處足跣能復棘

刺走峻坂如飛採毒藥炆藥射獵以續食人多衣白以錫飾笠頂望之皆白稱為白猺亦稱木皮猺常出鄉村貨其山間麋鹿皮及陵香降香之類性雖悍野不敢出

尚為患

永福縣志

猺一名畬客有四姓槃藍雷鍾自謂狗王後男女皆椎髻跣足結茆為居遷徙無常刀耕火種不供賦役善射

獵以毒藥塗弩矢中獸立斃

南寧府志

大良猺居處服食同獠而性亦淳謹敬慕華人至則雞

泰禮待近為獞所殘破散入村落樵採耕種與民無別

矣

臨桂縣志

永福大良獞在邊山毛崗龍溪板塘與民雜居舊謂之
木獞其俗男耕女織廬舍飲食與鄉民同婦髻髻上銳
下廣撮髮貫出其上絡珠鬘後為飾衣裳用五色絨雜
繡花卉男女踏歌為樂而不至相狎先年稍強盛肆劫
殺後經剿戮始附籍聽約束因號為良獞天順末為潮
北獞戰奪其田土逃竄外境隆慶大師後招回住大茅

源貫余村各村今又逃散

永福縣志

獐

獐即舊越人容貌衣服俗尚頗與獐同但獐婦之裙長有七八幅而獐婦之裙短只三幅耳縣治總有三百村獐得二百七十有餘村而民止得二十三村多寡強弱之不敵如此所可幸者猶喜知有朝廷法度惟一誠以來之信其約束不為紛更寬其網罟無恣羅織則欣然歸命輸納罔後知重信約無甚狡獪比獐夷獐為可制

卷二十四
云荔浦
縣志

永福南獞原自黎平慶遠谿峒越出正統間浸沒理定
縣境漸入本縣毛崗地方與徭角立分為東徭西獞正
德間為潮北獞殺逐僅居牛嶺西坑江頭營大卜灣數
村而已其俗與潮北獞稍異供養父母不欄居不相舂
雙塘不食犬肉婦人椎髻差圓而絡珠為飾其衣前衿
短而後衿長裙十幅細摺挑繡花卉異樣而顏色稍紅
為不同耳餘與潮北獞無異而絕不與之婚姻往來視

良徭為近之

永福縣志下同

湖北獐原出自湖廣靖州由懷遠流來浸沒古田境土
與南獐異弘治年間來本縣殺逐良徭并有其地其俗
男耕女織架欄而居下頓牛畜女人橫髻弁裳刺手為
文男子亦貫耳帶綿著為飾男女喜歌笑以示情愛婚
姻食猪牛為聘定女子嫁夫一夕遂返越三五載始歸
與夫同處父子異居父母衰老始收養之有病不事醫
藥深信巫鬼盛擊殺牛禱之有三牲五牲七牲十二牲

之說心有屈輒服蠱毒自死不惜有冤鳴衆論理名為
叫老如不平推牛糾衆連年仇殺隔世不忘不識文字
有事刻木通信事迫用火灼之以示急弱者投強以為
倚至老不入城市不奉拘提種類蕃盛夙稱永福民三
獠七為民害甚矣

南丹溪崗之人呼為獠其始未嘗至省元至元間莫國
麒獻圖納土自是獠人方入省地初柳慶邊山居民苦
於猺寇募獠人耕種且以禦猺久之獠與猺通遂侵民

田產擄民子女掠民財畜為害尤甚今考居宜山之邊境與隸各州縣者此種為多性氣剽悍椎髻跣足穿耳懸環男女如之出入身佩長刀持鏢戟負勁弩淬藥鏃專務殺人瀕江居則拒水路依山居則據陸險時或潛伏草莽肆行劫掠夜則明火執杖盜人牛馬綁縛人歸械以木格狀如春杼剗其兩端中鑿為竅納一足械之勒重噴取贖否則肢解之其居架木為欄下皆畜穢啖血肉婚不避姓時上元中元春秋社日男女答歌苟合

至有妊娠始歸夫家男服者短窄衫細褶裙其長過膝
女服者青衣花紋小袂裙以紅綠繒緣長則曳地不祀
先祖病不服藥惟祈鬼神每歲收穫畢則跳鬼酬賽男
女淫奔若至於仇殺子孫不忘

獐自元至元間方入省地近日編入版圖者謂之熟獐
性略馴其遠者謂之生獐梗化不可制服謂天為溫父
曰扶牛曰懷魯巴飯曰毫食曰艮亦有同中國者謂酒

曰醪謂鹽曰鹵

南寧府志

獐散處林麓無復聚落出入負弩短衫黽結貯粟巖竇
以銀為圈加於頸夜宿短衾露足不欲酣寢心好殺又
恐人謀已也本類相讎纖芥不已雖累世必復其鬪或
誤殺人者以牛畜為償或數十頭至百頭名曰人頭錢
流劫則糾黨麋起亦有渠長人先給銀三錢贍其家曰
鎗頭錢在山三五為羣要人於路曰伏草在江突衝而
出繫船取貨羈以求贖曰勾舡小則屠村堡大則窺城
邑滋蔓之久道路梗澀廬井為虛師興則遠遁深藏萬

山絕嶠莫可誰何且其人耐饑啖鹽數顆草木皆可食
自用兵以來誅者十五逃者十五不得已而招撫隨之

平樂
府志

獠

獠者蓋南蠻之別種無氏族之別依樹積木以居其上
名曰干闥好相殺害若殺其父走避外求得一狗以謝
不復嫌恨若報怨必殺而食之其俗畏鬼神尤尚淫祀
所殺之人美鬚髯者乃剥其面皮籠之於竹及燥號之

曰鬼鼓舞祀之以求福利至有賣其昆季妻孥盡者乃

自賣以供祭焉

北史

居天河縣之東鄉者曰獠其性視猺獠較馴亦頗譎詐
吝嗇力勤耕作善賈販多食蔬事佛甚謹凡食素者以
三年為率名曰血盤齋為其母報恩德報恩素食三年
者羣聚於佛寺鳩錢具蔬延浮屠作佛事以超薦其父
母謂之懺齋其婚娶燕飲禮甚簡陋亦吝嗇所致先時
垂髻蓬首跣足成化間知縣袁瑤禁之始巾幘草履亦

變俗之一機也

慶遠府志

伶人

大藤羅運山中具幽崖奧谷是生伶人雕題編結狀若
猩狒散育莽中不室而處卉衣血食言語侏離雖附近
諸徭亦莫能重譯也

炎徼紀聞

永福伶人來自義寧縣其俗與良徭同而語言各別婦
無髻髻用布纏箸作髻貼挿椎髻之中俗呼為苦麻伶
性氣視諸徭較馴有姓蒙者住板塘里蒙嶺村今絕村

為獐據

永福縣志

獐者獐之別種其性情氣習飲食居處服用器械及婚葬燕祭皆與獐同編入版籍略供賦役亦如熟獐但言

語差異今思恩縣南丹州有此種謂之苦薺獐

慶遠府志

荔波縣深溪崗中亦有獐俗與猯異而性克狠

同上

獐人饑拾橡薯射狐掘鼠蠹蠹蚋蜾甘之如薺卉衣鳥

言重譯四姓獐外曰狙其風罔聞意莊生所稱狙公云

赤雅

猧人

猧亦獠類不喜殺善音樂彈胡琴吹六管長歌閉目頓首搖足為混沌舞獠之有猧猶獠之有大良也

赤雅

猧人

猧亦獠類嗜殺過於獠父子有隙信信反噬弑父則疾走得一犬謝母母亦不恨

同上

猧人矜人猧人皆搖之別種性很暴及其氣習亦與猧同但其謁見官長不知跪拜以跣趺為敬

慶遠府志

犵人

犵人山田墾墾十歲九饑纖仇必報隳突漢界攻剽村

落或誤殺人則以牛畜為償曰人頭錢

赤雅下同

苗

苗自為一類其女善為漢音操楚調掛釵留客能為鸛

鵲舞生女則還母家曰一女來一女往

蜑人

蜑海上水居蠻也以舟楫為家採海物為生且生食之

入水能視合浦珠池蚌蛤惟蟹能沒水採取旁人以繩繫其腰引石縋而下得珠螺則繫繩動搖即引而上先煮毳衲極熱急覆之不然寒慄而死或遇諸海恠所觸往往潰腹折支人見血一縷浮水面知蟹死矣

虞衡志

蟹人瀕海而居以舟為宅或編蓬水澣謂之水欄以捕

魚為業辨水色以知龍居故又曰龍人

炎徼紀聞

蟹有三取魚者曰魚蟹取蠔者曰蠔蟹取材者多曰木蟹其人皆目睛赤碧卉衣血食各相統率魚蟹蠔蟹能

入水伏二三日一謂之龍戶一謂之崑崙奴

羸蟲錄

蜃人神宮畫蛇以祭自云龍種浮家汎宅或往水滸或往水欄捕魚而食不事耕種不與土人通婚能辨水色知龍所在自稱龍神籍稱龍戶莫登庸其產也

赤雅

蜃民原皆東來水蜃散處於此以網魚為活棲泊河下編竹為簾葺蓬為舍向猶二三十人今生聚漸多男婦約有百名口是可覘其安於樂土矣容固無衛所此類不入編戶不入保甲止籍其名以其艇或供水路往返

而官以祖食之近多投於巨室巨室亦因而利焉第繡江驛裁革別無差船此等蜚艇時不可缺所司既有意於士夫定分送之額則亦未可求多於若輩也而勢家

尤甚云

容縣志

蜚人有五姓麥濮吳蘇何古以南蠻為蛇種觀蜚家神宮蛇像可見世世以舟為居無土著唯捕魚裝載以供

食

南寧府志

馬人

馬人其先中國士卒隨馬援南征羈留未歸散處南海
遂成部落人人深目獬喙以採藤捕蠅為業產與黎同
者韓退之詩云衙時龍戶集上日馬人來人皆不識多
強解之由今而觀殆即此馬人之類也

四邊錄

馬人本林邑蠻相傳隨馬援北道散處南海或曰盧循
遺種也故又曰盧亭云

夷徼紀聞

盧亭人屬胎生或曰盧循遺種也黃睛短髮出沒海洋
以魚蝦為食惟雄者後有小尾長寸餘其牝牡則人也

語侏僂不可辨蜚人諳其性得其小者育之衣以樹皮
長令捕魚採珠取珊瑚極便捷其性專慤與山獐等乃
身腥穢不可近能伏水一二月正德間香山漁者冒中
曾獲一人嘉靖間倭黑孟陽捕海寇得一於舟中呈
解粵省因餐火食死焉識者謂為盧亭無乃鮫人之類
也乎

嶺海
異聞

山子

山子夷人散處橫州震龍六磨諸山谷中無版籍定居

惟斫山種畚鍤木盆鍋射獸而食之食盡又移一方男
女皆徒跣婦女大髻重可數斤其夫婦欲行人道則就
山中僻處先插青於路以斷來者或悞入則弩射之其
交類獸與人異

南寧府志

山子交媾媾精入地是生短狐善撫之能以夷人出沒
之情告也

赤雅

斑衣種女

種女與山子同類垂手善舞蹈歌短裙及膝坐則雙

膝齊跪執禮甚恭有盤古風劉禹錫蠻女鉤輶音蠻衣

欄斑布

赤雅下同

巴人

懷遠石陣臨溪陰風慘人猶聞鬼哭昔武侯立營於此
夜令云枕石者去枕草者留中夜撤軍枕石者不寐從
孔明去枕草者熟睡遂留茲土遺種斯在尚能操巴音
而歌烏烏

飛頭獠

飛頭獠頭將飛先一日頸有痕匝如紅縷及夜狀如病
頭忽飛去須臾飛還其腹自實其覺如夢雖獠不知也
余嘗入石袍山澗中偶見二頭一食蠐一食蚓見人驚
起食蚓者尚銜蚓而飛蚓食尺許雙耳習習如飛鳥之
使翼也獠俗賤之不與婚娶欲絕其類余按占城有尸
頭蠻本婦人目無瞳子飛頭食食童子糞盡童子輒
死目益明堪與此獠為婚一笑

鼻夷

鼻夷獠族鼻如垂鉤隅目好殺深明水脉采猿臂鯉牙
為遂吹作龍聲間出市鹽與之酒鼻飲輒盡

生丁白丁黑丁

椎結斑衣兒時即燒鐵石烙其跟蹠沁以蛇油重趼若
鄴穿箐走棘履險若夷

丁婦

黔面繡額為花草蜻蛉蛾蝶之狀嫁則荷傘懸履以戒
徒

廣西土官

廣西土官一百九十七思恩田州思明鎮安知府四人
思明結安下石西利州都結奉議思城上思龍英鎮遠
江州結倫思同果化都康茗盈萬承全茗上下凍泗城
太平向武南丹歸順安平萬承忠州思陵龍州歸德那
地東蘭上隆知州三十三人左州同知一人羅白憑祥
上林陀陵羅陽忻城知縣六人上林縣丞一人懷遠主
簿一人桂平貴溪典史二人永平寨波羅里大洞三寨

鎮安平鄉理源鎮高井寨尖山鎮周冲都樂壩古江口
羅目鎮慈樂寨東鄉巡檢十三人木盤浦鎮鄒寨白石
寨覃觀旺思隆鄉連城鄉武羅鄉武林鄉辛安寨東禪
鎮那龍寨大約鎮寨下市界牌鎮安城鎮歸仁鎮古眉
寨羣峯寨白面寨遷隆寨西舍寨麗壁市桑江口古寨
鎮三畔鎮三門灘鎮大寧寨龍門寨靖寧鄉宜良鎮都
博鎮新興鎮歸化鎮吉清鎮廖洞鎮江口鎮章駱鎮安
湘鎮樂善鎮莫離鎮武陽鎮中崗鎮通道鎮清流鎮思

管鎮鵞頸隘保江鎮西崗鎮潯江鎮萬石鎮安永鎮縣
廓鎮清水鎮李廣鎮思龍鎮東江鎮德勝鎮大曹鎮思
農鎮北蘭鎮安化鎮普義鎮吉定鎮歸思鎮上堡鎮金
城鎮方村蒙邨窮果兩江口峰門寨南源寨常安鎮龍
平寨西嶺寨鎮峽寨白霞寨邊蓬寨信都鄉沙田寨樊
家寨白花洞口渠樂寨金城寨八尺寨那樓寨橫山寨
南鄉南里鄉大宣鄉馱演鄉鵞頸鎮都名鎮丹陽鎮周
冲大宣鄉靖寧鄉大黃江口北山懷遠鎮湘山渡副巡

檢一百二人嘉靖七年初設武靖知州一人田州吏目
一人臨時巖馬甲大田子甲楊院思郎累彩怕河武龍
拱甲床甲婪鳳下隆縣甲篆甲砦桑怕牙思幼候周思
思白興龍定羅定安古零舊城那馬下旺都陽巡檢二
十八人改流官知州二人養利上石知縣二人崇善永

康鄭曉吾
學編

洪武二年正月湖廣行省臣言慶遠府地接八番溪洞
所轄南丹宜山等處宗元皆用其土酋為安撫使以統

之天兵下廣西安撫使莫天護首來款附宜如宋元制
錄用以統其民上從之詔改慶遠府為慶遠南丹軍民
安撫司置安撫使同知副使經歷各一員以天護為同
知王毅為副使

典秉
下同

七月廣西右江田州府土官岑伯顏來安府岑漢忠思
明府黃忽都太平府黃英衍向武州黃世鈇龍州趙帖
堅等各遣使奉貢方物詔以伯顏等各為本府知府世
襲世鈇等各為本州知州皆世襲

成化二年刑部主事馮俊上言臣生長廣西深識夷情
蓋廣西境內猺獞多居民少洪武間設立田州泗城等
府州選用土官世相統攝遇警悉聽調用使之懷德畏
威其餘種類令流官兼管是以反側靡常近年益甚今
總兵趙輔等奉命往征賊平之後恐有遺孽遠遁宜遣
官招撫或委附近土官管束或別立司府推選其類為
衆所信服者授以世襲長官治之事下兵部議令趙輔
韓雍等平賊之後斟酌舉行

典彙

嘉靖二十七年十二月詔向武州土官男黃仲金那地
州土官男羅廷鳳泗城州土官男岑施各就本處襲替
免赴京師以其嘗聽調有勞也

同上

左右江土官自唐已來有之有儂氏四道黃氏四道武
侯延衆等四鎮大者為州小者為縣又小者為洞宋開
拓寢廣州縣洞五十餘所多從國姓趙其官有知州權
州監州知縣知洞同發遣權發遣之屬謂之主戶民謂
之提陀華言百姓也其所掠得婢僕謂之家奴亦曰家

丁民之強壯者曰田子田丁亦曰馬前牌總謂之洞丁
妻曰媚娘雖曰羈縻然租稅不供文告不行其人民土
物非中國有也國朝仍其舊土稍加易置世官之下銓
一二流官佐之畔逆削絕者始郡縣其地每三年一進
貢馬匹方物然皆納價直而已有事則調發其兵量給
行糧事定論功賚以文錙重者錫冠裳加品級其兵精
者為內甲華言親丁也今儂姓絕無惟都結州姓農傳
云智高叛後更易而黃姓尚多如思明府思江向武歸

德思同思明六州上林陀陵羅陽三縣皆是也趙姓則
果化思城上下凍鎮遠龍州岑姓則鎮安歸順田州恩
城泗城武靖利州莫姓則南丹韋姓則東蘭忻城羅姓
則那地馮姓則都康佶倫許姓則下雷萬承李姓則太
平安平全茗茗盈龍英憑祥張姓則結安閉姓則下石
西梁姓則羅白其故絕更禪不可知然多山東青州人
未知其所從來也

百粵風
土記

諸土司惟田州泗城最强南丹次之田州臨大江地勢

平行沃野方數百里精兵萬人一呼即應土酋桀驁反側時與諸土司為難故未暇窺我內地泗城方千餘里兵倍田州散居巖洞石城險絕芭蕉關尤峻而固南丹差小而兵悍勁敢死諸司憚之二酋忠順不貳次則東蘭那地皆有精兵其他微小朝貢不絕非藉中國威令無以自存

同上

土官瓦氏

田州女土官瓦氏嘉靖十四年調之征倭至蘇州索有

司捕蛇為軍中食敗倭於王江涇時人語云花瓦家能殺倭腊而啖之有如蛇

嘉靖甲寅倭寇吳中廣西女土官瓦氏率萬人來援泊胥關月餘馭衆有法度約所部不犯民間一粒軍門下檄輒親視居亭民訴部夷奪酒脯者立捕殺之食尚在咽下其出軍幟分五色以別行伍頭裹方素無他色者或問瓦云身是孟獲裔孫感武侯七赦恩誠子孫世世戴縞以識不忘耳

董斯張
吹景集

土兵

粵西左江兵不可用可調惟右江土官喜於見調兵人日米一升計價月可一錢俱為土官所得兵自齎糧且獻名倍役數以規糧給

見聞雜記

粵右狼兵鷙悍天下稱最然多非真狼真狼必土官親行部署纔出舊制調征狼兵所經過處不許入城蓋其性貪淫離家遠出罕御酒肉不獲縱貨色之欲含怨懷恨惟劫於其主之威而已在有司善遇之不則剽掠之

性一動不可復制矣

嶠南
瑣記

諸土司兵曰狼兵皆驍勇善戰而內甲尤勁非土官親帥之則內甲不出往歲征倭平大藤諸賊及皮林崖黎皆用之然驕蹇無紀律往往取敗所過剽掠不可禁止華林崗賊反檄田州兵勦之路人謠云華林賊來亦得土兵來死不測然中國之善用狼兵者不獨以其勇也漢兵行有安家行糧而土兵止給行糧省費一倍每兵一日僅白金一分二釐耳所謂惜小費而忘大害者也

近日援黔援山海俱有調狼兵之議然土司桀驁視昔
百倍見安奢之變有輕中國心我能必制其命乎中途
反噬悔之何及當事者宜熟思之也

百粵風
土記

戍兵

永樂初調湖廣貴州軍征廣西蠻遂留戍其地後貴州
軍以征麓川撤回獨留楚軍萬人分戍桂林柳州平樂
諸州邑有萬戶及裨將統之閱歲踐更然水土不習多
至病死間逃亡不赴者法不能盡繩也其戍守梧州則

粵東軍原以萬數今減為三千云

百粵風土記

土司兵故精勁每遇警輒徵召大者數千計小者百計行之既久兵日驕恣民且苦兵總督尚書王守仁以徵召頗數人不堪命因議更番戍守之法省戍者三千戍梧者四千戍柳者二百地方小警以戍兵撲滅魚書不煩而足裨緩急其制良善然窮年外處月餉無幾武夫悍卒多不樂役第以老憊充數到伍以後潛歸相續名存實亡警報一聞又不得不議徵兵矣萬厯十六年督

府劉繼文以地方寧謐議減戍卒之數但兵額既減而虛名如故也然土兵入內地窺我虛實且易搆鬪故不至者亦不取盈云

同上

達目

洪武中分置故元降將納克楚諸王噶爾薩及其官屬於闐廣廣西自是有達目弘正間哈密之役土魯番使臣發廣西安抽收入桂林中右二衛而近有口外歸降者資遣而來槩謂之達目今桂林達官指揮千戶百戶

總旗達軍達目共一百八十六名梧州達舍二十名初
但食以祿糧自廣東黃蕭養之亂奏准隨征其後一縣
差調習騎射敢勇耐勞行陣間頗得其力

百粵風
土記

土官朝貢例

明洪武間例土官三年朝覲進貢一次布政司給文起
送限本年十二月終到京貢物不等

廣西與雲貴同

馬 犀角 孔雀尾 象牙 象鈎 象鞍 象脚

盤 蚬蛇膽 金銀器皿 青紅寶石 玉石 圍

帳 金戎索 各色絨線 各色手巾布 花藤席

降香 黃蠟 檳榔

隨地所有不拘例

嘉靖元年議入貢馬匹就彼變賣銀兩貯庫降香黃蠟
茶葉等物要重五十五斤為一扛每扛賞潤生絹二匹
照扛遞加

土官承襲例

明洪武二十六年例廣西土官承襲務要驗封司委官體勘別無爭襲之人明白取其宗支圖本并官吏人等結狀呈部具奏照例承襲正德初令極邊有警地方暫免赴京餘各照舊

通志
下同

嘉靖七年例土官病故其應襲兒男查勘無礙止令以官男孫名色就彼襲替權管地方俟著有功勞然後授以冠帶俟功勞再著然後授署職俟功勞屢著然後實授本職

嘉靖九年土官衙門造冊將見在子孫盡數開報某人年若干歲係某氏生應該承襲某人年若干歲某氏生係以次土舍未生子者候有子造報願報弟姪若女者聽布政司送吏兵二部查照

嘉靖二十八年例應襲土舍曾經調遣効有功勞者暫免赴京就彼冠帶署印管束部民待後功勞顯著方許實授

萬曆二十年三院會議土舍初襲照舊小帽管事三年

後若守法奉公兵糧完足者給冠帶至六年九年勞績
愈彰漸次議加署職實授如有恣肆不檢讎鄰構兵及
錢糧兵馬負欠逾期追奪示罰仍置立宗枝文簿印貯
轄屬該道遇土官嫡妻生子限一月內具報該府報道
填註用為日後勘襲左券以杜爭端

萬厯二十二年例土官土舍與民間子弟不同一經援
納假借大寇交結生事糜擾地方深為未便通行廣西
撫按衙門一體禁革

萬厯二十四年例凡有土官土舍告加納級等項一體嚴行禁革施行

按土官初隸吏部驗封司洪武三十年凡掌土兵者改隸兵部其襲替開武選司大抵與驗封不異洪武中土官無子弟其壻與妻皆得襲永樂中襲替人文出十年者亦聽然皆萬里赴闕或獻馬方物請命最謹天順八年上兩京徽號詔許土官繳呈勘奏即與冠裳於是介使未將威福自恣雖托羈縻之名竟開驕悍之漸成化

十五年又有納穀備賑之令則經制日卑規取愈陋孝
宗末年發憤釐革至正德旋復隳廢嘉靖九年始曲為
條約稍復祖宗之舊今攷府州縣正貳幕屬巡檢驛傳
凡三百六十隸驗封宣慰宣撫招討安撫長官凡一百
三十二隸武選隸驗封者皆領於布政司武選所隸或
領於都司文武相維機權攸寓細大相關掌股易運數
年來鎮撫巡部諸臣建白日煩紛更已甚矣

典彙

土司銜

凡土司官有武銜者宣慰使同知安撫司正長官副長官土千戶百戶之類是也有文銜者土府同知通判推官土州同土縣丞主簿巡檢之類是也長官司有屬宣慰司者有屬府州縣者有屬衛者武銜土官與屬宣慰長官專用目把漢把蠻而蠻者也文銜土官與屬府州長官事統於郡守州守縣令蠻而漢者也屬衛長官與衛官世姻而勢難鉗制不蠻不漢者也

朱國禎湧
幢小品

土司世胄

土司惟諸岑最強冑出岑彭畫像雲臺精應列宿布星
祭神威擬王者其女珠衣雀扇火齊金鏡乍見訝為仙

者

赤雅
下同

岑家兵略

岑氏家法七人為伍每伍自相為命四人專主擊刺三
人專主割首所獲首級七人共之割首之人雖有照獲
主擊刺者之責但能奮殺向前不必武藝絕倫也

法制

土司法極嚴肅鞭笞殺戮其人死無二心民怯於私憤
勇於公鬪似秦嚴刑峻法嫻于文詞似鄭商販入其境
以二槍交植境上曰關稅未輸而越關者許射之既輸
暮行露宿貨物狼籍無敢睨者

攻掠

凡有攻掠禱鬼誓衆乃推渠長尙官把酒賜綠熊練醢
錦雉毳毼綠熊辟塵錦雉善鬪欲其絕塵而鬪也練醢
臂衣也毳毼戰服也

雲韁君兵法

嶠南瑣記東蘭那地南丹三州狼兵部署之法與此同

雲韁娘相思寨兵能以少擊衆部署之法將千人者得以軍令臨百人之將將百人者得以軍令臨十人之將一人赴敵則左右大呼夾擊一伍爭救之一人戰沒左右不夾擊立斬一伍之衆皆論罪及截耳一伍赴敵則左右呼而夾擊一隊爭救之一伍戰沒左右伍不夾擊者即斬一隊之衆皆論罪及截耳不如令者斬退縮者斬走者斬言惑衆者斬敵人衝而亂者斬敵以金帛遺

地拾者斬其功賞之法戰沒者臨陣躍馬前鬪因而破敵雖不獲級而能奪敵之氣者受上賞斬級者論首級斬級而冠同伍者輒以其伍屬之

驪娘盛飾

猗女握兵符者得冠偏髻之玉披紫鳳之裘曳蝶綃佩文犀之印望之若神人矣何謂偏髻中以暖玉琢雙鳳頭握髮盤之北齊服禮志八品女冠偏髻結與此略同鳳裘白州綠含鳳毛所織色久鮮服之辟寒蝶綃冰蠶

所珥織作蝶紋輕逾火浣服之辟暑諺曰鳳裘無冬蜨
綃無夏趨雪無前韞雲無價趨雪駿馬名也

四姓髻鬟

髻有芙蓉有望仙有懷人有雙蛇有孤鳳有濃春有散
夏有懊儂有萬疊愁有急手粧其下者有椎結有垂鞭
有盤蛇有鹿角豪家髻鬟稍不稱者羣笑之目為丁粧
錦有驚頭錦花蕊錦蛇濡錦以蛇膏澤之辟毒霧入水
不濡亦名龍油錦簇蝶錦以熟金為之古詩惆悵金泥

簇蜨裙春來猶得伴行雲

徭人祀典

徭古八蠻之種五溪以南窮極嶺海迤邐巴蜀藍胡槃
侯四姓槃姓居多皆高辛狗王之後以犬戎奇功尚帝
少主封於南山系落繁衍時節祀之劉禹錫時節祀槃
瓠是也其樂五合其旗五方其衣五彩是謂五參奏樂
則男左女右鐃鼓胡盧忽笙雷響瓠雲陽祭畢合樂男
女跳躍擊雲陽為節以定婚媾側具大木槽扣槽羣號

先獻人頭一枚名吳將軍首級余觀祭時以桄榔麪為
之時無罪人故耳設首羣樂畢作然後用熊羆虎豹呦
鹿飛鳥溪毛各為九壇分為七獻七九六十三取斗數
也七獻既陳焚燎節樂擇其女之姱麗嫺巧者勸客極
其綢繆而後已十月祭多貝大王男女連袂而舞謂之
蹋徭

粵西叢載卷二十四

欽定四庫全書

粵西叢載卷二十五

桂林府通判汪森編

歷代馭蠻

採學海通志

周安王十五年吳起相楚悼王南并蠻越遂有洞庭蒼梧

秦始皇帝二十五年王翦略定越地

三十三年遣任囂趙佗擊南越平之置南海桂林象郡

漢武帝元鼎五年秋遣伏波將軍路博德帥師擊南越
克之置珠崖南海蒼梧鬱林交趾等九郡

光武建武十七年遣伏波將軍馬援征交趾平之

安帝元初三年蒼梧蠻夷反遂招誘鬱林合浦蠻漢數
千人攻蒼梧鄧太后遣侍御史任連奉詔赦之賊皆降
散

順帝永和中侍御史賈昌朝與州郡討區憐等不克帝
召百官議之

桓帝延熹五年長沙零陵賊入桂陽蒼梧南海交趾刺史及蒼梧太守望風逃奔遣御史中丞盛修督州郡募兵討之不能克

資治通鑑

延熹三年蠻夷相聚與居風縣人朱達等攻殺縣令以夏方為交趾刺史降之

靈帝建寧三年烏潯人衆亂獷悍難制時鬱林太守谷永以恩信招降十餘萬內屬皆授以冠帶開置七縣光和元年春合浦交趾烏潯蠻叛攻掠郡縣四年夏刺

史朱儁破之

三年秋七月蒼梧桂陽賊起零陵楊璇討平之

三國吳赤烏十一年蒼梧賊亂交州刺史陸徹平之

冬十月魏交州太守楊稷表毛吳為鬱林郡太守

建衡二年吳蒼梧太守陶璜破交州執晉守將楊稷毛
吳三年以陶璜為交州牧攻降夷獠

梁中大通三年樂山侯正則先有罪徙鬱林招誘亡命

欲攻番禺廣州刺史元仲景討斬之

資治通鑑

隋開皇十七年桂州俚帥李光仕作亂帝遣上柱國王世積發嶺北兵與前桂州總管周法尚發嶺南兵討之俱會於尹州以令狐熙為桂州總管降之

是年秋七月桂州人李世賢反上議討之諸將數人請行上不許顧右武侯大將軍虞慶則曰位居宰相爵乃上公國家有賊遂無行意何也慶則拜謝恐懼乃以慶則為桂州道行軍總管討平之

資治通鑑

唐高祖武德初蕭銑未平以李靖為大將帥巴蜀之師

討之靖駐師富川之長標嶺號令嚴肅秋毫無犯銑平以靖為嶺南撫慰大使今富川廟祀不絕

三年左衛大將軍馮盎擊破蒼梧諸郡據之五年馮盎等來降初李靖以功檢校荊州刺史乃度嶺至桂州分道招慰盎承李靖檄以所部來謁以其地為高羅春白等八州嶺南悉平

是年南平獠渠帥真以寧越鬱林地降自是交愛數州始通

太宗貞觀元年嶺南酋長馮盎等迭相攻擊遣員外散騎侍郎李公淹持節諭之初盎與諸酋長談殿等迭相攻擊久未入朝諸州皆奏盎反上欲發兵討之魏徵諫曰嶺南瘴癘險遠不可以宿大兵且告者已數年而盎兵未嘗出境此不反明矣若遣信臣示以至誠可不煩兵而服上乃遣李公淹持節慰諭盎遣其子智戴隨使入朝上曰魏徵一言勝十萬之師不可不賞乃賜絹五百匹

七年玉洞獠反以右屯衛大將軍張士貴為龔州道行軍總管平之

十二年鈞州獠叛桂州都督張寶德討平之

高宗永徽二年賓義二州蠻寇邊桂州都督劉伯英敗之

龍朔三年柳州蠻叛莫州都督劉伯英以嶺南兵伐之儀鳳中南蠻反令裴懷古馳驛往懷輯之懷古既至申明誅賞歸者日以千計俄縛首惡遂定南方蠻夷立石

著功後始安賊歐陽倩聚衆數萬標掠州縣以懷古為
桂林都督招討使懷古躬至壁撫諭倩等大喜悉歸所
掠請降雖諸洞素翻覆者亦牽連報附嶺外以平

唐延載元年嶺南獠反以容州都督張玄遇為桂永等

州經畧大使以討之

資治通鑑

肅宗至德初西原黃橙等尚蠻叛僭號為王乾元初始
遣使討降之

乾元初夷酋梁崇牽等合兵內寇桂管經畧使邢濟擊

平之

代宗廣德二年梁崇牽等據容州經略使王翊募兵擊平之

德宗貞元十年西原黃崗首領黃少卿攻邕管以唐州刺史陽旻為容管招討經畧使討平之先是邕管經畧使孫公器請發兵討少卿德宗不許命中人招諭不從俄陷欽橫潯貴四州少卿子昌沔趨勇前後陷十三州氣勢益振陽旻引師掩賊一日六七戰皆破之侵地悉

復

河間王孝恭遷襄州道行臺左僕射遣使綏輯嶺表諸
州時嶺表未平孝恭分遣使綏輯安慰其款附者四十
九州

漢陽郡王環代孝恭為荊州都督遣使慰諭嶺外酋豪
時嶺外酋豪數相攻擊環遣使諭以威德酋豪皆如約
不敢亂

憲宗元和十一年黃少卿復屠巖州桂管觀察使裴行

立請討之

是年黃少卿復攻欽橫二州邕管經略使韋悅破之

穆宗長慶四年少卿酋領黃昌瓏遣其黨陳少奇等歸
欵經略使聞于朝納之是時儂氏黃氏與韋氏周氏並
為西原部酋領而儂黃最強盛得邕管經略使徐申厚
撫之黃氏納質而入三部二十九州蠻皆定

敬宗寶曆元年黃少卿與其弟少高歸欵初少卿攻陷
州郡為招討使陽旻所破元和初邕州又擒其別將黃

承慶至是少卿始降乃拜為歸順州刺史少高為賓州
刺史

文宗太和間經畧使董昌齡遣子蘭討平儂黃尚夷時
種黨諸蠻帖然畏服有違命者必嚴罰之

唐咸通元年秋七月南詔攻邕州陷之先是廣桂容三
道共發兵三千人戍邕州三年一代經畧使段文楚請
以三道衣糧自募土軍以代之朝廷許之所募纔得五
百許人文楚入為金吾將軍經畧使李蒙利其闕額衣

糧以自入悉罷遣三道戍卒止以所募兵守左右江比
舊十減七八故蠻人乘虛入寇時蒙已卒經略使李弘
源至鎮纔十日無兵以禦之城陷弘源與監軍脫身奔
蠻州二十餘日蠻去乃還弘源坐貶建州司戶文楚時
為殿中監復以為邕管經略使至鎮城邑居人什不存

一資治
通鑑

咸通間員州黃尚首領儂金勒等自相攻殺邕管節度
使辛讜遣人諭解之

乾符六年桂陽賊陳彥謙陷柳州殺刺史董岳

資治通鑑

昭宗大順二年環林賊叛據宜州蘓仕評入援平之是年宜之環林等州賊叛據其城賊立僞元帥發號令官軍逃匿殆盡仕評柳州亞將開遊弈院於柳聞變發兵從間道出一枝自洛黃東來一枝取道羅城一枝從遷江入賊腹背受敵斬獲無算餘黨盡皆解去宜州復平宋太祖開寶三年南漢劉鋹據嶺南賦斂繁重作刀山劍樹之刑太祖歎曰吾當救此一方民以潘美為桂州

行營都部署伐之銀遣龔澄樞來逆宋師至富川克之
明年克賀州又攻昭桂下之

五年邕州獠人作亂廣州行營都監朱憲大破之於容
州

七年南丹州酋帥莫洪膺遣使陳紹規奉表求內附九
年南丹州酋帥莫洪膺來貢求賜牌印詔刻印以給之
太宗太平興國二年命邕州廣源州酋長坦坦綽儂民
富為檢校司空御史大夫上柱國

五年南丹州酋帥貢銀百兩以賀太平自洪膺領州十餘年每歲輸白金百兩

雍熙四年南丹州土人莫淮閭作亂詔服之淮閭莫洪膺族人知寶隆鎮有牛為宜州牙校周承鑒所得淮閭遣人取之不還淮閭怒領鄉兵劫取承鑒家貲誘羣蠻為寇使供奉官王承緒發諸州兵進討兵未至悉已遁歸以詔諭之不復為寇

六年撫水蠻數寇邊境取民口畜產下詔書招安之

淳化元年南丹州土官莫洪皓遣其子淮通來貢洪皓
襲兄洪膺職稱刺史遣淮通來貢銀盃二十銅鼓三面
銅印一鈕旗一帖繡真珠紅羅襦一帝降優詔賜綵百
匹還其襦

是年莫洪皓引兵攻弟下詔戒之洪皓襲兄洪膺職專
地利不修常貢其弟洪沅忿之挈妻子來奔宜州洪皓
怒其背已數引兵攻之洪沅與二男并牙將一人乘傳
詣闕訴其事請發兵致討上以蠻夷之俗羈縻而已不

欲為之興師報怨沅先自稱南丹州副使以為邵州圍
練使給田十頃下詔戒勅洪皓

真宗咸平四年撫水蠻又為寇宜州守將擒其黨送闕
下賜錦袍冠帶銀絲戒勅遣之

景德元年西南牂牁諸國遣使奉貢詔廣南西路發兵
援之時詔西南牂牁諸國進奉使親至朝廷者發兵援
之又矜其道遠人馬多斃因詔宜州自今可就賜恩物
二年賊掠容州蒼梧陳坦然諭退之

三年撫水酋蒙填以其部蠻侵邊詣宜州自陳願朝貢
謝罪詔守臣諭以盡還所掠民貨畜乃從其請

四年詔約勒宜州亂軍時宜州軍亂朝廷恐宜融溪尚
因緣侵擾因降詔約勒酋領皆奉詔部分種族無敢輒
動

大中祥符六年撫水州酋指揮蒙坦挈族來歸徙于桂
州

是年詔以歸化州酋蒙隻補壯密州別駕兼海州都押

牙蒙隻乃殿直肚之子先嘗告賊署為昭州押牙因詔補以前任賦以官田

九年詔南丹州莫淮迪約勒谿崗勿從誘脇時撫水州蠻叛恐誘脇谿崗因詔莫淮迪約勒之及撫水州蠻平迪等並以勞進秩初宜州言淮迪頗集諸蠻阻富仁監道路帝察知淮迪無侵擾狀遣使犒諭撫勞之

是年撫水州蠻數寇詔從曹克明俞獻可便宜掩擊大敗之首帥蒙承貴等面縛詣軍門俯首謝罪詔令弗殺

承貴因請改州縣名自是不復為患

仁宗景祐三年南丹州莫淮戰挈族來歸命為湖南州
團練副使刺州

四年安化州蠻寇宜融州詔廣西鈐轄討之

慶元元年安化州蠻寇融宜州詔發澧潭二州戍兵合
數千人往擊之賊勢方熾至殺運糧官吏復詔促兵討
之乃平

慶厯四年宜州蠻區希範謀叛詔購討平之

慶厯間安化州蠻攻殺將吏所部卒懼誅謀欲叛徐的諭降之

皇祐元年儂智高謀叛命狄青為宣撫使率諸將討平之

是時宜州所隸鎮寧州蠻酋莫陵等七百人內寇遣西京作防使郭志高閭門祇候梁詔熙往討未至而陵等詣桂宜州巡檢李仲政請降廣西轉運使不俟詔貸其罪詔劾之已而釋之

是時樞密副使王堯臣請析廣西宜容邕州為三路以融柳象隸宜州白高賓雷代鬱儀藤梧龔瓊隸容州欽賓廉橫潯貴隸邕州遇蠻入寇三路會支郡兵掩擊令經略安撫使守貴州以統治焉益募澄海忠敢士軍分屯運全永道三州米以餉之罷遣北兵遠戍時狄青經制嶺南詔青審議以為便

至和二年安化州入貢詔以知州蒙全會為三班奉職又以監州姚全料為借職

是時融州屬蠻大丘酋領楊光朝內附又有楊克端等一百三人來歸

嘉祐六年安化州來貢自來貢後月赴宜州參謁及貢巨板每歲州四犒賞三歲聽輸所貢兵械於思立砦以其直償之通以官資遷補

英宗治平三年左右兩江凡四十五谿峒知州將各籍其壯丁聽廣南西路安撫司調集以備緩急

神宗熙寧三年徭賊殺人南丹酋長莫世忍執以獻授

檢校禮部尚書

五年章惇遣喬執中知全州將往而大田三砦蠻犯境又飛山之蠻近在全州之西執中至全州大田諸蠻納款於是遂檄諭開梅山蠻徭爭闢道路以待

九年春正月交趾陷邕州知州蘓緘死之先是交趾讖青苗法大舉入寇邊城王安石聞欽廉陷已不悅以趙高為安南招討使宦者李憲副之交人復入寇邕州蘓緘悉力拒守外援不至城遂陷緘殺其家三十六人因

自焚死城中人感緘之義無一人從賊者于是交人盡屠其民五萬八千餘口二月召李憲還以郭達為安南招討使趙高副之帥師討交趾詔占城占臘合擊之十二月郭達敗交趾於富良江悉復之

元豐三年南丹州莫世忍入貢其印以西南諸道武盛軍德政官家明天國王為文詔以南丹州印賜之今毀其印

六年莫世忍以大軍討安化州蠻因獻弓矢自言願世

世為外臣脩貢不懈遷檢校戶部尚書給銅牌旗號官
其子侄九人

哲宗元祐初詔悉廢所置郡時傳堯俞言置沅誠二州
以來費巨萬計公私騷然朝廷方務休息痛懲邀功生
事者廣西張整融州溫嵩皆置之罪詔諭湖南北及廣
西路悉廢所置郡

徽宗崇寧二年安化州酋蒙光有復嘯聚為寇經略司
遣將官黃忱等擊却之

冬十二月融州酋楊晟天等內附

三年十二月廣西黎峒酋楊晟免等內附

五年十二月廣西黎峒酋韋晏聞等內附

尋令廣西招納左右江四百五十餘峒

大觀二年安化州以戶口來附是年安化州以三州一鎮戶口六萬一千來附上詔以知融州程鄰往黔南路撫諭官吏推恩有差

欽宗靖康中賊曹成據道賀二州以岳飛為荊湖東路

都總管討平之

高宗紹興元年詔議處置諸州隘砦時監察御史明索言湖南邊郡及二廣之地舊置谿峒歸明官比年寢廣宜令二廣湖南帥臣處置適宜無啟邊禍詔下其議

三年以南丹州酋長莫公晟為都巡檢使初公晟攻圍觀州焚寶積監宰臣朱勝非奏此皆崇觀宣和以來所開新邊往往棄而不守帥臣監司屢言觀州為控扼之地不宜棄帝曰前日用事之臣貪功生事公為欺罔其

實勞民費財使遠俗不安也廣西經畧安撫使劉彥適
又言公晟自添差路分鈐轄逃去後未曾差官乞先與
一職名欲於選郡下添入知南丹州兼潯甯都巡檢使
提舉盜賊公事舊賜南丹州刺史印令依舊行使從之
而公晟未出受命

四年詔罷廣南西路平觀二州時明索言平觀二州宜
罷樞密院亦上言廣西沿邊堡砦昨因邊臣希賞改建
州城侵擾蠻夷大開邊釁地屬徼外租賦亦無所出而

支費煩冗郡民不堪其敝遂皆廢罷唯平觀二州以帥臣所請故存今觀明索所奏利害之實昭然可見緣帥臣又稱公晟於南丹觀州實積監境上不時竊發若廢二州恐於緣邊事宜有所未盡詔令廣南西路帥漕憲司共條其利害以聞既而諸司交言平觀二州因敝已甚有害無益請復祖宗舊制為便詔從其言

八年命廣西漕臣仍復饋運靖州是年帝問左右曰靖州隸湖北今聞仰給廣西何也趙雄對曰靖州本谿峒

神宗時叛為城州元祐間廢尋復為軍徽宗朝始改靖
州與桂府為鄰故令廣西給其金穀之費近歲漕司匱
乏乃責辦諸州以故不能如約宜復舊制俾廣西漕臣
如期饋運靖州屯戍官兵聽守臣節制於事為便帝從
之

十年四月全州建議立屯防閑谿崗山徑其議云本州
密邇谿崗邊民本非姦惡其始朝廷禁法非不嚴密監
司州郡非不奉行特以平居失於防閑故馴致其亂又

兼溪谷山徑非止一途如靜江永安之大通墟武岡軍之新寧盆溪及八十里山永州之東安皆可以徑達谿峒其地綿亘郡邑非一州得專約束遊民惡少之棄本者商旅之避征稅者盜賊之亡命者往往由之以入萃為淵藪交相鼓扇深為邊患為今計者宜徙閒地巡檢兵及分遣士卒屯諸谿谷山徑間俾湖南北廣西帥憲總其役庶幾事權有所歸而號令可行也

十五年詔禁騷擾谿峒瑶人知全州高楫言瑶人今皆

微弱不敢先侵省地若官每縱人深入掠其財物遂致
乘間竊發宜詔禁谿崗接壤州郡毋擾徭人庶使邊民
安業以廣陛下柔遠好生之德帝納其言詔守臣一遵
成法務在撫綏

二十四年南丹州酋長莫公晟貢馬率諸蠻來歸初公
晟以王祖道開邊激叛幾二十年至是始納款帝諭輔
臣曰得南丹非為廣地也但徭人不叛百姓安業為可
嘉爾是年以莫延沈襲公晟職廣西經略安撫使呂愿

中諭降諸蠻三十一種得州二十七縣一百三十五砦
四十峯一百七十九及一鎮三十二團皆為羈縻州縣
是時安化州酋蒙全劒等八百人劫義寧砦火其屋宇
廣西帥臣遣縣砦將佐發兵討平之

孝宗乾道四年二月詔湖南北四川二廣州軍應有谿
峒處務先恩信綏懷毋弛防閑毋襲科擾毋頻攻而啟
釁委各路帥臣監司常加覺察

是月詔禁民獠交通沿邊姦人毋越近谿峒誘致蠻獠

侵內地違者論如律其不能防閑致越逸者亦罪之

九年廣西帥范成大諭降諸徭

淳熙元年南丹為永樂州所攻使來告急廣西帥臣將領陳泰權天河縣主簿徐彌高諭和之

六年夏六月陸川賊李接攻陷鬱林博白等州縣圍容州不克守臣李端卿棄城走

七年營鬱林州城陸川賊入據州治後援兵自雷州至賊退走

十一年勅漕帥以時給溪崗鹽錢初知宜州馬寧祖不
支思立砦鹽錢執議以為前守所積逋止給錢一月不
能遍及蠻部權思立砦將領楊良臣復鎮撫乖方遂致
激變安化蠻蒙光漸等作亂詔罷良臣貶寧祖秩而有
是勅

是時安化州蠻蒙光漸率衆剽掠犯宜州思立砦廣西
兵馬鈐轄沙世堅出兵討之初世堅言官軍與瑶人兵
器利鈍不同宜勅沿邊軍州多置强弩毒矢以懼瑶人

從之時馬寧祖楊良臣激變光漸等因命世堅討之
十二年廣西漕臣禁民私販鹽利通夷時漕臣胡廷直
議謂邕州之左江永平太平等砦在祖宗時以其與交
趾鄰壤實南邊藩籬重地故置其州州籍其丁壯以備
一旦之用規模宏遠矣比年邊民率通交趾以其地所
產鹽雜官鹽貨之及減易馬鹽以易貨忽而不防恐生
邊釁所宜禁戢既而諸司上言經略司初準朝旨置馬
鹽倉貯鹽以易馬歲給江上諸軍及御前進用銀綿悉

與蠻夷互市其永平砦所易交趾鹽貨居民食皆舊制也況邊民素與蠻夷私相貿易官不能制今一切禁絕非唯左右居民乏鹽而蠻情之叵測恐致乖異乃牒邕民禁民毋私販交趾鹽以妨鈔法

寧宗慶元四年蒙尙蠻袁康等為亂廣西帥司招降之嘉定三年章戡議請增置雄邊軍人知靜江府章戡議請廣西所部二十五處三方臨谿尙與蠻徭黎蜆雜處跳梁負固無時無之西南最為重地邕欽之外羈縻州

七十有二地里綿邈鎮戍非一請增置雄邊軍二百人及調憲司甲軍二百隸帥府初安平州李密侵鄰尚劫掠邊民併取古甌尚以其幼子變姓名為趙懷德知尚事戡諭邕守推古甌一人主之

十一年詔增築城堡練習民兵以息邊患是年臣僚復上言慶厯間張方平嘗以為朝廷每備西北殊不知猺獠衝突嶺外南鄰交趾勢須經營唐時西備吐蕃其後安南寇邊旋致龐勛之禍國朝每憂契丹元昊而儻智

高陷邕州南徼騷動天子為之旰食豈細故哉臣等比見淮南間版築薦興更戍日益而廣南城隍摧圯不葺戍兵逃亡殆盡春秋教閱郡無百人雖有鄉兵義丁之名實不足用緩急豈能集事宜於嶺南要地增築城堡籍其民兵歲時練習定賞罰格以示懲勸如此則號令嚴明守禦完固民習戰鬪可息猺蠻侵掠之患詔從之度宗咸淳二年叛賊楊先攻陷容州知州趙若詵死之元世祖至元十四年南丹牧莫秀太內附時阿爾哈雅

率兵取靜江分遣萬戶托歡布哈徇慶遠下之秀太納
歟

四月特磨道將軍將農士貴知安平州李維屏知安州
岑從毅等以所屬州縣谿洞一百四十七戶二十五萬
六千來附

至元二十一年二月壬辰邕州賓州民黃大成等叛梧
州韶州衡州相連而起湖南宣慰使色勒敏將兵討之

資治
通鑑

成宗元貞二年二月廣西賊陳飛雷通藍青謝發寇昭
梧藤容等州湖廣左丞巴特瑪新擊平之

資治通鑑

大德間兩江岑雄與黃聖許等讎殺擾邊出榜招諭之
時二族屢相讎殺湖廣行省司郎中謝讓謂此曹但可
懷柔不宜力競寬法羈縻俾不致跳梁可也若舍中國
有用之民爭炎荒不毛之地非長策也因榜諭以安之
仁宗延祐元年秋八寨徭寇橫州

四年九月兩江龍州萬戶趙清臣太平路總管李興隆

率土官黃法扶何凱並以方物來貢

英宗至治二年十二月兩江來安路總管岑世興遣其弟世元入貢

晉王泰定二年六月廣西諸徭叛命湖廣行省左丞奇珠兵部尚書李大成將兵二萬二千討之時桂林柳州屬湖廣故令湖廣行省討之

七月靜江徭為寇遣廣西宣慰使發兵捕之

十月廣西徭潘見寇柳州命湖廣行省左丞奇珠捕討

之是時廣西宣慰使捕獲猺酋潘寶下獄其弟潘見遂
寇柳州故仍命湖廣行省討之

是月廣西猺酋何童降請防邊自效從之

三年二月廣西金茗州土兵許文傑率諸猺以寇茗盈
州殺知州事李德卿等命湖廣行省督兵捕之

四月鎮安路總管岑修廣為弟修仁所攻來告命湖廣
行省辯治之

五月來安路岑世興及鎮安路岑修文率山獠角蠻六

萬餘人為寇命湖廣雲南行省招諭之

八月太平路總管郭扶奉方物來獻

十二月右江諸寨土官岑世忠等奉方物來獻

是時兩江黃聖許與岑雄二族讎殺元城高昉為湖廣行省平章請詔諭之是時黃聖許岑雄二族又相讎殺元城高昉謂遐荒之人撫則治擾則亂請部使者詔諭之果相率效順

致和二年十二月兩江來安路總管岑世興作亂遣兵

討之

文宗天曆二年二月廣西思明路軍民總管黃克順奉
方物來獻

八月廣西思明州土官黃宗永遣其子奉方物虎豹來
獻

至順元年閏七月廣西徭于國安率衆一千五百人寇
修仁荔浦等縣命廣西元帥府發兵捕之賊皆潰走生
擒國安

十月廣西徭寇橫州及永淳縣勅廣西元帥府率兵捕之

十一月詔促官軍進勦徭賊時徭賊叛官軍進勦稽遲廣西廉訪司言今討叛徭各行省官將兵二萬人皆屯駐靜江遷延不進曠日持久恐失事機詔遣使趣之至二年四月徭賊悉平

順帝元統二年二月廣西徭寇邊殺官吏陷賀州大掠富川又攻恭城平樂命廣西宣慰使都元帥章巴延為

鎮國上將軍統河南江浙江西湖廣諸軍及八番義從軍討平之

後至元初慶遠南丹等處谿峒安撫司莫忠赦黨賊殘民平章特默齊討之時忠赦弟莫八等率其黨以叛道路不通至正初巴延與省臣議遣使招諭莫忠赦之子莫鎮南弟忠動莫七莫八莫十等來降聞於朝皆命之以官


至正十二年兩江峒賊黃聖許等攻掠永淳縣於是遷

縣治於三州村

二十八年二月南丹州莫國麟入覲上授國麟以安撫使三珠虎符

二十九年閏六月土官黃聖許叛詔討之初邕州上思州土官黃聖許擁衆二萬結交陟為援寇陷忠州江州及華陽諸縣詔遣右丞程鵬飛討之聖許敗走入交陟九月中書省請設管軍民司官時中書省臣言邠雞十圍安化等來附尙蠻凡八萬宜設管軍民司以其土人

蒙意蒙世莫仲文為長官以呂天祐塔布岱為達魯噶
齊



粵西叢載卷二十五